



「大智度論」集粹之四十四

論菩薩摩訶薩發趣大乘

佛告須菩提：「汝問：『云何菩薩摩訶薩大乘發趣？』菩薩摩訶薩行六波羅蜜時，從一地至一地，是名菩薩摩訶薩大乘發趣。」

須菩提白佛言：「世尊！云何菩薩摩訶薩從一地至一地？」

佛言：「菩薩摩訶薩，知一切法無來去相，亦無有法若來、若去，若至若不至，諸法相不滅故。菩薩摩訶薩於諸地，不念不思惟而修治地業，亦不見地。何等菩薩摩訶薩治地業？菩薩摩訶薩住初地時，行十事：一者、深心堅固，是不可得故；二者、於一切衆生中等心，衆生不可得故；三者、捨心，與人、受人不可得故；四者、親近善知識，亦不自高；五者、求法，一切法不可得故；六者、常出家，家不可得故；七者、愛樂佛身，相好不可得故；八者、演出家法，諸法分別不可得故；九者、破憍慢法，生慧不可得故；十者、實語，諸語不可得故。菩薩摩訶薩如是初中住，修治十事治地業。」

菩薩摩訶薩住二地中，常念八法。何等八？一者、我法淨；二者、知恩報恩；三者、住忍辱力；四者、受歡喜；五者、不捨一切衆生；六者、入大悲心；七者、信師，恭敬諮受；八者、勤求諸波羅蜜。是名菩薩摩訶薩住二地中，應滿足八法。

菩薩摩訶薩住三地中，應行五法。何等五？一者、多學問，無厭足；二者、淨法施，亦不自高。三者、莊嚴佛國土，亦不自高；四者、受世間無量勤苦，不以為厭；五者、住慚愧處。菩薩摩訶薩住三地中，應滿足五法。

菩薩摩訶薩住四地中，應受行不捨十法。何等十？一者、不捨阿練若住處；二者、少欲；三者、知足；四者、不捨頭陀功德；五者、不捨戒；六者、穢惡諸欲；七者、厭世間心；八者、捨一切所有；九者、心不沒；十者、不惜一切物。是名菩薩摩訶薩住四地中不捨十法。

智一銘

菩薩摩訶薩住五地中，遠離十二法。何等十二？一者、遠離親白衣；二者、遠離比丘尼；三者、遠離憍惜他家；四者、遠離無益談說；五者、遠離瞋恚；六者、遠離自大；七者、遠離蔑人；八者、遠離十不善道；九者、遠離大慢；十者、遠離自用；十一者、遠離顛倒；十二者、遠離淫怒癡。

菩薩摩訶薩住六地中，當具足六法。何等六？所謂六波羅蜜。復有六法所不應爲。何等六？一者、不作聲聞、辟支佛意；二者、布施不應生憂心；三者、見有所索心不沒；四者、所有物布施；五者、布施之後心不悔；六者、不疑深法。

菩薩摩訶薩住七地中，二十法所不應著。何等二十？一者、不著我；二者、不著衆生；三者、不著壽命；四者、不著衆數，乃至知者、見者；五者、不著斷見；六者、不著常見；七者、不應作相；八者、不應作因見；九者、不著各色；十者、不著五衆；十一者、不著十八界；十二者，不著十二入；十三者、不著三界；十四者、不作著處；十五者、不作所期處；十六者、不作依處；十七者、不作依佛見；十八者、不作依法見；十九者、不作依僧見；二十者、不作依戒見。復有二十法應具足滿。何等二十？一者、具足空；二者、無相證；三者、知無作；四者、三分清淨；五者、一切衆生中具足慈悲智；六者、不念一切衆生；七者、一切法等觀，是中亦不著；八者、知諸法實相，是事亦不念；九者、無生法忍；十者、無生智；十一者、說諸法一相；十二者、破分別相；十三者、轉憶想；十四者、轉見；十五者、轉煩惱；十六者、等定慧地；十七者、調意；十八者、心寂滅；十九者、無礙智；二十者、不染愛。

菩薩摩訶薩住八地中，應具足五法。何等五？順入衆生心；遊戲諸神通；觀諸佛國；如所見佛國，自莊嚴其國；如實觀佛身，自莊嚴佛身；是名五法具足。復具足五法。何等五？知上下諸根；淨佛世界；入如幻三昧；常入三昧；隨衆生所應善根受身。

菩薩摩訶薩住九地中，應具足十二法。何等十二？受無邊世界所度之分，菩薩得如是願，知諸天、龍、夜叉、犍闥婆語而爲說法，處胎成就，生成就，家成就，姓成就，眷屬成就，出生成就，出家成就，莊嚴佛樹成就，一切諸善功德成滿具足。

十地菩薩，當知如佛。」

須菩提白佛言：「云何菩薩摩訶薩深心治地業？」

佛言：「菩薩摩訶薩應薩婆若心，集諸善根，是名菩薩摩訶薩深心治地業。」

須菩提問：「云何菩薩於一切衆生中等心？」

佛言：「若菩薩摩訶薩，應薩婆若心，生四無量心，所謂慈、悲、喜、捨，是名於一切衆生中等心。」

須菩提問：「云何菩薩布施？」

佛言：「菩薩施與一切衆生，無所分別，是名修布施。」

須菩提問：「云何菩薩親近善知識？」

佛言：「能教入薩婆若中住，如是善知識，親近諮受，恭敬供養，是名親近善知識。」

須菩提問：「云何菩薩求法？」

佛言：「若菩薩應薩婆若心求法，不墮聲聞，辟支佛地，是名求法。」

須菩提問：「云何菩薩常出家治地業？」

佛言：「菩薩世世不雜心，佛法中出家，無能障礙者，是名常出家治地業。」

須菩提問：「云何菩薩愛樂佛身治地業？」

佛言：「若菩薩見佛身相，乃至阿耨多羅三藐三菩提，終不離念佛，是名愛樂佛身治地業。」

又問：「云何菩薩演出法教治地業？」

佛言：「菩薩，若佛現在，若佛滅度後，爲衆生說法初、中、後善，妙義好語，淨潔純具，所謂修妬路，乃至優波提舍，是名演說法教治地業。」

又問：「云何菩薩破於憍慢治地業？」

佛言：「菩薩破是憍慢故，終不生下賤家，是名菩薩破於憍慢治地業。」

又問：「云何菩薩實語治地業？」

佛言：「菩薩如所說，如所行，是名實語治地業。是爲菩薩住初地中，修行十事治地業。」

論者言：須菩提問發趣大乘，佛答發趣大乘相。菩薩摩訶薩乘是乘。知一切法，從本已來，不來不去，無動無發，法性常住故。又以大悲心故，精進波羅蜜故，方便力故，還修諸善法；更求勝地而不取地相。亦不見此地。

大乘卽是地，地有十分，從初地至二地，是名發趣。地有二種：一者、但菩薩地；二者、共地。共地者，所謂乾慧地，乃至佛地。但菩薩地者，歡喜地、離垢地、有光地、增曜地、難勝地、現在地、深入地、不動地、善相地、法雲地。

入初地菩薩應行十法，深心乃至實語，應薩婆若心，集諸善根。薩婆若心者，菩薩摩訶薩，初發阿耨多羅三藐三菩提意，作是願：我於未來世當作佛，卽是應薩婆若心。應者，繫心願我當作佛。若菩薩利根，大集福德，諸煩惱薄，過去罪業少，發意卽得深心。深心者，深樂佛道，世世於世間心薄，是名應薩婆若心。所作一切功德，若布施、若持戒、若修定等，不求今世後世福樂、壽命、安隱，但爲薩婆若。

菩薩因利根，諸煩惱薄，福德純厚，不樂世間，信等五根成就純熟故，乃能識別善惡。十善道、聲聞法猶尙愛樂，況無上道而不深念！初發無上道心，已於世間最上，何況成就，菩薩始得般若波羅蜜氣味故，能生深心。如人閉在幽闇，微隙見光，心則

踴躍，作是念：衆人獨得見如是光明，欣悅愛樂，卽生深心。念是光明，方便求出。菩薩亦如是，宿業因緣故，閉在十二入無明黑闇獄中，所有知見，皆是虛妄；聞般若波羅蜜，少得氣味，深念薩婆若，我當云何於此六情獄得出，如諸佛聖人，以是故生深心。

深心者，一切諸法中愛，無如愛薩婆若，一切衆生中愛，無如愛佛。又深入悲心，利益衆生，如是等名深心相，初地菩薩常行是心。

於一切衆生等心者，菩薩得是深心已，等於一切衆生，衆生常情，愛其所親，惡其所憎。菩薩得深心故，怨親平等，視之無二。此中佛自說：等心者，四無量心是。菩薩見衆生受樂，則生慈、喜心，作是願：我當令一切衆生皆得佛樂。若見衆生受苦，則生悲心愍之，作是願：我當拔一切衆生苦。若見不苦不樂衆生，則生捨心，作是願：我當令衆生捨愛憎心。捨心者，捨有二種：一者、捨財行施；二者、捨結得道。此以除慳爲捨，與第二捨結作因緣，至七地中乃能捨結。

求法者，法有三種：一者、諸法中無上，所謂涅槃；二者、得涅槃方便，八聖道；三者、一切善語、實語，助八聖道者，所謂八萬四千法象，十二部經。四藏：所謂阿含，阿毗曇、毗尼、雜藏；摩訶般若波羅蜜等諸摩訶衍經，皆名爲法。此中求法者，讀誦、書寫、正憶念，如是等治衆生心病故，集諸法藥，不惜身命，名曰樂法。

常出家者，菩薩知在家有種種罪因緣，我若在家，自不能得行清淨行，何能令人得諸淨行？若隨在家法，則有鞭杖等苦惱衆生，若隨善法行，則破居家法。作是念：我今爲衆生故捨家，持清淨戒，求佛道。具足尸羅波羅蜜因緣。此中佛自說：菩薩世世不雜心出家。不雜心者，不於九十六種道中出家，但於佛道中出家。所以者何？佛道中有二種正見：世間正見，出世間正見故。

愛樂佛身者，聞種種讚佛功德，十力、四無所畏、大慈大悲、一切智慧；又見佛身三十二相，八十種隨形好，放大光明，天人供養，無有厭足。自知我當來世，亦當如是。假令無得佛因緣，猶當愛樂，何況當得而不愛樂，得是深心愛樂佛故，世世常得值佛。

演出法教者，菩薩如上求法已，爲衆生演說。菩薩在家者，多以財施；出家者，愛佛情重，常以法施。若佛在世，若不在世，善住持戒，不求名利，等心一切衆生而爲說法。讚歎檀義故，名爲初善分別；讚歎持戒，名爲中善；是二法果報，若生諸佛國，若作大天，名爲後善。復次；見三界、五受衆身多苦惱，則生厭離心，名爲初善；棄捨居家，爲身離故，名爲中善；爲心離煩惱故，名爲後善。

妙義好語者，三種語雖復辭妙而義味淺薄，雖義理深妙而辭不具足，以是故，說妙義好語。離三毒垢故，但說正法，不離非法，是名清淨。八聖道分、六波羅蜜備故，名爲具足。

破憍慢者，是菩薩出家持戒，說法能斷衆疑，或時自恃而生憍慢。是時應作是念：我剃頭著染衣，持鉢乞食，此是破憍慢法，我云何於中生憍慢？又此憍慢，在人心，則覆沒功德，人所不愛，惡聲流布，後身常生弊惡衆生中，若生人中，卑鄙下賤。知是憍慢，有如是無量過罪，破是憍慢，爲求阿耨多羅三藐三菩提故。以破憍慢故，常生尊貴。終不在下賤家生。

實語者，是諸善之本，生天因緣。人所信受。行是實語者，不假布施、持戒、學問，但修實語，得無量福。實語者。如說隨行。

佛爲法王，諸法中得自在，知是十法，能成初地。

戒清淨者，離破戒垢，皆名清淨，乃至聲聞、辟支佛心，尙是戒垢，何況餘惡。

知恩報恩者，知恩者，是大悲之本，開善業初門人，所愛敬，名譽遠聞，死則生天，終成佛道。不知恩人，甚於畜生。菩薩作是念：若人有惡事於我，我猶尙應度，何況於我有恩。

住忍辱力者，忍波羅密中已廣說。菩薩初行故，但言不志不瞋，是衆生忍，不說法忍。

不捨一切衆生者，善修習大悲心，誓度衆生故，發心牢固故，不爲諸佛賢聖所輕笑故，恐負一切衆生故不捨。

佛因果法中，無有代受罪者，何以菩薩發願：於無量劫代受地獄苦？蓋菩薩宏大之心，深愛衆生，若能代理，必代不疑。

多學問無厭足者，多學問是智慧因緣，得智慧則能分別行道。菩薩能受持十方諸佛所說之法。

不捨阿練若住處者，離衆獨住，若過聲聞、辟支佛心，是名離衆。一切法以無所得空故，不取不著相，乃至阿耨多羅三藐三菩提，亦不取，用無著心故。

不捨頭陀功德者，以無生法忍爲頭陀。菩薩住於順忍，觀無生忍。是十二頭陀，爲持戒清淨故，持戒清淨爲禪定故，禪定爲智慧故，無生忍法即是真智慧；無生法忍是頭陀果報，果中說因故。

遠離親白衣者，行者以妨道故出家，若復習近白衣，則與本無異。以是故，行者先求自度，然後度人。若未能自度而欲度人者，實不知浮人，欲救於溺，相與俱沒，是菩薩摩訶薩遠離親白衣，則能集諸清淨功德，深念佛故，變身至諸佛國，出家剃頭染衣，所以者何？常樂出家法，不樂習近白衣故。

遠離比丘尼者，不共比丘尼住，乃至彈指頃亦不生念，是名遠離比丘尼。是菩薩未得阿鞞跋致，未斷諸漏，集諸功德，人所樂著，以是故，不得共住。又爲離人誹謗，若誹謗者墮地獄故。

菩薩深念衆生故，大悲心故，知一切法畢竟空故，施時無所惜，見有求者，不瞋不憂，布施之後，心亦不悔，深清淨信敬諸佛，具足六波羅密，雖未得方便，無生法忍、般舟三昧，於深法中亦無所疑，唯佛智慧，滅諸戲論，無有闕失故。是爲菩薩摩訶薩發趣大乘。